

CARTA VMNÁÁⁿ VMNAAⁿ YEⁿE SAN PEDRO

**Pedro idingúuⁿ yā carta 'cūū
yeⁿē hermanos chi i'téenu
yā Jesucristo hermanos chi
s'nééⁿ 'muuⁿ chi s'nééⁿ miⁿ**

1 'Úú Pedro 'úú ni 'úú 'áámá
apóstol yeⁿe Jesucristo. Ní
Cristo dichó'o yā 'úú chi 'úú candé
nduudu cuaacu yeⁿe Ndyuūs. 'Úú
idingúuⁿ carta 'cūū yeⁿe 'iiⁿ'yāⁿ chi
i'téenu yā Señor Jesucristo ní nguéé
chiⁱ ch'etinéé yā na yáāⁿ yeⁿe yā tí
cheⁿe 'nééⁿ 'múúⁿ cheⁿe 'nééⁿ miⁿ
yā ndii yáⁿāa yeⁿe Ponto, yeⁿe
Galacia, yeⁿe Capadocia, yeⁿe Asia,
ndúúcū Bitinia. ²Ní idinguúⁿ yeⁿe
ndís'tiī, 'iiⁿ'yāⁿ chi Ndyuūs ndéene
yā tan'dúúcā chi Ndyuūs deenú
yā chi caⁿ'a yā diⁿ yā ndíí vmnááⁿ
vmnaaⁿ. Ní Espíritu N'dai yeⁿe
Ndyuūs ní nadidéevé yā ndís'tiī
cáávā chi n'giindiveéⁿ nī yeⁿe yā ní
cáávā yuuúⁿ yeⁿe Señor Jesucristo
chi nadidéevé yā ndís'tiī. Neⁿ'é chi
Ndyuūs téé yā ndís'tiī n'dee n'dái
vaadi n'dai yeⁿé yā ní vaadi 'diīⁿ
cuuvi ch'etee nguaaⁿ ndís'tiī.

³Dich'etee ca yú Ndyuūs chi
chiida Señor Jesucristo caati nééne
ya'ai iinú yā s'uuúⁿ chi dííⁿ yā chi
ch'iindiyáāⁿ ngai yú. Chuū dííⁿ yā

caati nadacuéeⁿ yā Jesucristo yeⁿē
nguaaⁿ tináⁿā. Maaⁿ ní cucáávā
Ndyuūs tee yā s'uuúⁿ 'áámá vida
ngai yeⁿe yú ní véé esperanza
yeⁿe yú. ⁴Ní cūnee ngiinu yú
yeⁿe tanducuéⁿē vaadi n'dai yeⁿé
Ndyuūs chi Ndyuūs ngaⁿ'á yā chi
tée yā s'uuúⁿ chi cuuvi yeⁿe yú.
Ní Ndyuūs nanguáin'dai yā cáávā
s'uuúⁿ chiⁱ chi cuuvi yeⁿe yú na
va'ai cheeti nguuvu naachi nguéé
cuuvi chōō. Ní nguéé cuuví 'cuéé,
ndíí nguéé cúuví ch'ó'oo yeⁿē. ⁵Ní
chuū chi Ndyuūs nguáin'dai yā
ní cáávā ndís'tiī ti ndís'tiī i'téenu
nī Jesucristo. Ní Ndyuūs dííⁿ yā
cuidado ndís'tiī ndúúcū poder yeⁿé
yā 'naaⁿ chi cūnee ngiinú nī chi
nadanguáⁿ'ai yā ndís'tiī chi cuuvi
déenu nī yeⁿe chuū tiempo chi
cuchiī.

⁶Ní canee chi yeenú nī yeⁿe
chuū 'aara chi dindaachí nī duu'vi
tiempo nūuⁿ 'naaⁿ chi n'geenú nī
ngiī n'dee n'dái cosas chí ngií.
⁷Cáávā chi i'téenu nī Jesucristo
vaadi i'téenu yeⁿé nī ní tan'dúúcā
'díí'nguāⁿ, 'tífcā. Ní 'iiⁿ'yāⁿ canéé
chi n'diichineeⁿ 'díí'nguāⁿ ndúúcū
yaⁿ'ā caati cuuvi deenú yā chi
dámaāⁿ 'díí'nguāⁿ. Ní 'tiicā

ntúūⁿ vaadi i'téenu yeⁿ'é nī 'iiⁿ'yāⁿ canéé chí n'diichíneeⁿ yā. Ní vaadi i'téenu yeⁿ'é nī nduuti chi ichéé yeⁿ'e tanducuéⁿ'ē taachi 'iiⁿ'yāⁿ n'diichineeⁿ yā yeⁿ'ē, tuu'mi ní cuaacu chi i'téenu nī ní 'áámá cūnee vaadi i'téenu yeⁿ'é nī nguéé ti 'díⁿ'nguāⁿ chí n'giinu. Cuayiivi taachi ndaá Jesucristo tuu'mi ní dich'eté yā ndís'tiī ní díⁿ' yā honrar ndís'tiī ní díⁿ' yā chi n'deévé ngii ndís'tiī cáávā chi n'daacā ca i'téenu nī Jesucristo.

⁸Áará chi nguéé n'diichí yā Jesucristo dineⁿ'é nī 'iiⁿ'yāⁿ. Ní i'téenu nī 'iiⁿ'yāⁿ 'áará chi nguéé inaáⁿ nī 'iiⁿ'yāⁿ. Maaⁿ ní neené yeenú nī ndúúcū vaadi yeenu chi ch'etē taavi ca. Ní nguéé véé nduudu yeⁿ'é nī chi cuuvi caaⁿ'máⁿ nī yeⁿ'ē. ⁹Ní neⁿ'é nī tunééⁿ nī nguuvi chi Ndyuūs nadanguáⁿ'ai yā almas yeⁿ'e nī. Ní cáávā chuū chi i'téenu ca nī Ndyuūs.

¹⁰Tiempo chi 'āā chó'ōo 'iiⁿ'yāⁿ profetas chi candéé yā nduudu yeⁿ'é Ndyuūs neené n'dai n'nuuⁿ yā yeⁿ'e chi Ndyuūs nadanguáⁿ'ai yā 'iiⁿ'yāⁿ. Ní itínguuneeⁿ yā yeⁿ'e chuū. Profetas ní 'iiⁿ'yāⁿ chi ngaⁿ'á yā yeⁿ'e chi Ndyuūs caⁿ'á yā chí téé yā ndís'tiī yeⁿ'e chi n'dai taavi ca yeⁿ'é yā. ¹¹Ní profetas ní neⁿ'é yā deenu yā yeⁿ'e tiempo 'cūū nī táácā cuuvi chó'ōo yeⁿ'e tiempo 'cūū taachi Cristo 'cúeenú yā cuuvi ní cuchēē yā. Ní cuayiivi cuchii chi dēévé ngii yeⁿ'é Cristo caati Espíritu yeⁿ'e Cristo chi canee ndúúcū profetas 'āā ch'iⁿ'í yā profetas yeⁿ'e chuū. ¹²Naati Ndyuūs ch'iⁿ'í yā profetas chi tiempo yeⁿ'e Cristo yeⁿ'e chi ngaⁿ'a yā nguéé cuuvi n'diichí

profetas naati ndís'tiī ní 'āā n'diichí nī. Profetas ngaⁿ'á yā nduudu cuaacu yeⁿ'e chi cuchii naati ndís'tiī 'āā n'giindiveéⁿ nī chí 'āā chó'ōo chíⁿ' chí caⁿ'a yā. Ní cáávā 'iiⁿ'yāⁿ chí ngaⁿ'á yā ngii yā ndís'tiī nduudu cuaacu chí Jesús nadanguáⁿ'ai yā 'iiⁿ'yāⁿ ndúúcū poder yeⁿ'ē Espíritu N'dai yeⁿ'é Ndyuūs. Ní Ndyuūs dich'óo yā Espíritu N'dai yeⁿ'é yā yeⁿ'ē va'ai cheeti nguuvi nanááⁿ s'uúúⁿ. Ní nducuéⁿ'ē chuū ní ángeles maáⁿ yā neⁿ'e yā snaaⁿ yā dendu'ū.

Ndyuūs yaa'ví yā 'iiⁿ'yāⁿ chi cuuvi yeⁿ'é yā ní n'daacā ca cuuví yā

¹³Maaⁿ ní cáávā nducuéⁿ'ē chuū nadacadíínuuⁿ nī n'daacā yeⁿ'e chí caⁿ'á nī díⁿ nī ní 'cuēetinéé n'daacá nī. Ní cunee ngiinú nī dámaāⁿ yeⁿ'e nducuéⁿ'ē chí n'dai taavi chí Señor Jesucristo caⁿ'á yā téé yā ndís'tiī taachi ndaa yā taama vmnéⁿ'ēē. ¹⁴Ndís'tiī ní 'caandiveéⁿ nī nduudu yeⁿ'é Ndyuūs ti daiya Ndyuūs ndís'tiī. Ní nguéé díⁿ nī tan'dúúcā chí díⁿ nī nducuéⁿ'ē chí neⁿ'e maáⁿ nī taachi 'āā cuéé n'diichí nī Ndyuūs. ¹⁵Maaⁿ ní 'cuēetinéé n'daacā nī chí nguéé véé nuuⁿ'ndi yeⁿ'é nī caati Ndyuūs chí yaa'ví yā ndís'tiī chí cuuvi yeⁿ'é yā ndís'tiī ní dēēve yā. ¹⁶Canéé nguūⁿ na libro yeⁿ'é Ndyuūs 'tíicā: Canéé chí díⁿ n'daacá nī chí dēēve nī caati 'úú, Ndyuūs, ní dēēve 'úú.

¹⁷Nduuti chí ndís'tiī ní ngaⁿ'á nī chí Ndyuūs ní chiidá nī ní caacá nī Ndyuūs chí cunnee yā ndís'tiī, canéé chí 'cuēetinéé n'daacá nī ní 'va'á nī Ndyuūs neⁿ'e chí cunee nī iⁿ'yeeⁿ'dí 'cūū. Ndyuūs yeⁿ'e yú 'āā daamá nūuⁿ n'guúⁿ yā

nducyaaca 'iiⁿyāⁿ. Ní n'diichí yā ca'áamá cā'aama yā tan'dúúcā chi ch'ēetinee yā ndúúcū ntiiⁿnyuⁿ chi dííⁿ yā. ¹⁸Deenú nī chi Ndyuūs nadanguáⁿai yā ndís'tii yeⁿe vida chi nguée n'daācā chi sta'á nī yeⁿe 'iiⁿyāⁿ yeⁿe ndaata yeⁿé nī. Ní n'dáácā ca deenú nī chi nadíí'vē yeⁿe chi nadanguáⁿai yā ndís'tii. Nguée cuái yā ndúúcū dendu'ū chí nchōō tan'duucā 'dííⁿnguāⁿ o 'dííⁿnguē. ¹⁹Naati Ndyuūs nadanguáⁿai yā ndís'tii ndúúcū yuūúⁿ chi yaⁿ'ai chíí'vē ti yuūúⁿ yeⁿe Cristo. Cristo ní ca'a yā maáⁿ yā cuerpo caavā ofrenda chi 'iiⁿyāⁿ s'eeⁿ 'caaⁿnúⁿ ya 'yā. Ní Cristo miiⁿ tan'dúúcā 'áámá 'iiti cuūchī chi nguée n'gai tī ní nguée de'ē vee ndíí yeⁿe tī, 'tííca yā. ²⁰Ní Ndyuūs ndēevé yā Cristo chi maáⁿ yā cuerpo yeⁿé yā cuuvi ofrenda ndíí vmnááⁿ vmnaaⁿ taachi 'āā cuéeⁿ din'dái yā iⁿ'yeeⁿdí 'cūū. Naati maaⁿ ní nguuvī s'eeⁿ Ndyuūs ch'iⁿi yā Cristo nanááⁿ ndís'tii ní caavā ndís'tii. ²¹Ní cucáávā Cristo miiⁿ ní ndís'tii i'téenu nī Ndyuūs chi nadacuéeⁿ yā Cristo yeⁿé nguaaⁿ tináⁿā. Ní Ndyuūs dich'ēetē yā Cristo ndúúcū honor. Ní ndís'tii 'āā i'téenu nī Ndyuūs ní cūnee ngiinú nī yeⁿé chi Ndyuūs caⁿ'a yā chí tée yā ndís'tii chi cuuvi yeⁿé nī.

²²Maaⁿ ní chi 'āā i'téenu nī nduudu cuaacu yeⁿé Cristo cucáávā Espíritu N'dai yeⁿé Ndyuūs 'āā didēevé nī staava yeⁿé nī chi dineⁿé nī hermanos yeⁿe yú. Canée chi dineⁿé taavi cá nī 'aama nī taama nī hermanos ndúúcū staava yeⁿé nī chí dēeve. ²³Ndís'tii ní 'āā ch'iindiyáaⁿ nī taama vmnéⁿēe

nguée yeⁿé 'iiⁿyāⁿ yeⁿé iⁿ'yeeⁿdí 'cūū chí 'cuūvi yā naati yeⁿe nduudu yeⁿé Ndyuūs, nduudu chi canduuchi ní 'áámá cūnee cueⁿe daāⁿmaⁿ. ²⁴Caati canée nguūⁿ na libro yeⁿé Ndyuūs 'tííca:

Tanducuéⁿē 'iiⁿyāⁿ yeⁿe iⁿ'yeeⁿdí 'cūū ní tan'dúúcā yaātā ní tanducuéⁿē chi n'gēete ca yeⁿé 'iiⁿyāⁿ ní tan'dúúcā naāndā yeⁿe yaātā, 'tííca yā. Yaātā miiⁿ ní tī'í ní naandā miiⁿ ní n'geeⁿ,

²⁵naati nduudu cuaacu yeⁿé Ndyuūs ní 'áámá cūnee cueⁿe daāⁿmaⁿ.

Ní nduudu cuaacú 'cūū yeⁿe evangelio chííⁿ chi candée 'iiⁿyāⁿ nanááⁿ ndís'ií.

2 Maaⁿ ní cáávā chuū diví nī 'áámá lado nducuéⁿē chi dííⁿ nī chi nguée n'daācā ní nguée canche'éeⁿ nī. Ndíí nguée caaⁿmaⁿ nī dendu'ū chi nguēe cuaacu. Ndíí nguée ndúú dííⁿ nguēē nī yeⁿé taama 'iiⁿyāⁿ. Ndíí nguée ndúú ngaⁿ'a nī nduudu yaadi yeⁿé 'iiⁿyāⁿ. ²Ní ndís'tii tan'dúúcā chi dacua'aá chi caama 'niindiyááⁿ ní neⁿe leche, 'tííca ndís'tii. Dííⁿ nī ní neⁿé nī leche chi nduudu n'dai yeⁿé nduudu cuaacu. Ní cuuvi cu'téenu cá nī ndúúcū nduudú 'cūū tan'dúúcā dacua'aá cuuvi 'cuiitá yā ndúúcū leche n'dai. ³Tííca cuuvi dííⁿ nī nduuti chi cuaacu nííⁿnyúⁿ n'diichíneeⁿ nī Señor Jesucristo chí n'dai yā.

Jesucristo ní tan'dúúcā tuūu ch'ēete chí canduuchi

⁴Ndís'tii canée chi ndaa niiⁿnuúⁿ nī nanááⁿ Señor Jesucristo ti tan'dúúcā

'áamá tuūu ch'ēete chí canduuchi
'tiicá nī. 'Ii"yā" ye"e i"yee"dí
'cūū nguée' cuú" yā tuuú mii" ti
nadacadíínuu" yā chí nguée' dichí'vē
naati Ndyuūs ndēēve yā tuūu mii" chí
ya"ai chí'vē chí Cristo. ⁵Ní ndís'ti
ntúū" tan'dúúca tuūu cánduuchi
'tiicá nī ti Ndyuūs 'āā teé yā ndís'ti
vida ngai. Ca'a nī lugar Ndyuūs
chí cuta'á yā vida ye"e ndís'ti ní
din'dái yā ye"e cuerpo ye"e ndís'ti
'áamá yaācū ye"e Espíritu N'dai
ye"é Ndyuūs. Ní ndís'ti canée
chí dií" nī ntii"nyu" ye"e chiiduú
ye"e yaacú 'cūū ní ca'á nī ofrendas
nanáá" Ndyuūs ndúúcu chí duuchi
Jesucristo, ofrendas chí Ndyuūs
cuuvi 'cuáa" yā. ⁶Ní 'tíicā canée nguū"
na libro ye"é Ndyuūs cáāvā chuū:

Quin'diichí nī. 'Úú Ndyuūs cu'neé"
yāā" Sión 'áamá tuūu ch'ēete
ye"e cimienta ye"e esquina
ye"e yaācū. Tuūu mii" n'dēēvé
ní ya"ai chí'vē. 'Ii"yā" chí
i'téenu yā Señor ye"e yú chí
tuūu ch'ēete mii" nguée' cuuvi
'cuinaá" yā ye"e Señor ye"e yú.

⁷Ní tuūu mii" ní neené véé chii'vē
cucáāvā ndís'ti chí i'téenu nī Cristo
naati nguée' 'tíicā tuūu mii" nanáá"
'ii"yā" chí nguée' i'téenu yā. 'Tíicā
canée nguū" na libro ye"é Ndyuūs:

Tuūu míf" nūu" chí 'ii"yā" chí
din'dái yā yaācū nguée' 'cūū"
yā ti nadacadíínuu" yā chí
nguée' dichí'vē. Tuuú 'cūū nūu"
ní tuūu ch'ēete ye"e cimienta
ye"e esquina.

⁸Ní canée nguū" na libro ye"é
Ndyuūs táamá chí 'tíicā:

Tuuú 'cūū ní dii" chí cuundí ca'a
'ii"yā" nī tuūu míf" chii" chí
cundēēve 'ii"yā".

Cuaacu chí indée' ca'a yā ti nguée'
n'giindiveé" yā nduudu cuaacu ní
Ndyuūs dii" yā chí 'tíicā canee chí
dii" 'ii"yā" s'ee".

Ye"e 'ii"yā" chí ye"e Ndyuūs

⁹Ndís'ti ní ye"e 'ii"yā" chí
Ndyuūs ndēēvé yā. Ndís'ti ní
chiiduú ye"e Ndyuūs chí Rey.
Ndís'ti ní ye"e ndaata dēēvé.
Ndís'ti ní ye"e Ndyuūs ndís'ti.
'Tíicā dii" Ndyuūs caati ndís'ti
cuuvi caa"má" nī chí ch'ēete n'dai
chí dii" Ndyuūs. Ndyuūs n'gai yā
ndís'ti ye"e na maa" ní ndaá nī
nanáa" yā ná déévé chí n'dēēvé
n'dai ye"e maá" yā. ¹⁰Ndís'ti ní
tiempo chí chó'oo ní nguée' ye"e
Ndyuūs ndís'ti naati maa" ní 'tiicá
nī. Tiempo chí chó'oo Ndyuūs nguée'
ya'ai 'iinú yā ndís'ti naati maa" ní
'tíicā déenu nī chí Ndyuūs ya'ai 'iinú
yā ndís'ti ti ye"é Ndyuūs ndís'ti.

**'Ii"yā" chí 'áamá dii" yā
ntii"nyu" ye"e Ndyuūs**

¹¹Ndís'ti hermanos ye"é chí
ne"é taavi, 'úú idi'cuiitú ndís'ti chí
tan'dúúca 'ii"yā" chí snúú" yúúní
'tiicá nī ne"e chí snée nī i"yee"dí
'cūū ndís'ti. Nguée' dii" nī nuu"ndi
tan'dúúca chí ne"e cuerpo ye"é
nī chí dii" nī caati chii" chí ne"e
cuerpo ye"é nī ní cue"e daā"ma"
contra ye"é chí ne"e staava ye"é
nī. ¹²Cueetinée' n'daaca nī nguaa"
'ii"yā" chí nguée' i'téenu yā nduudu
cuaacu ye"é Ndyuūs. Ní 'áará chí
nga"á 'ii"yā" s'ee" contra ye"e
ndís'ti tan'dúúca chí ndís'ti ní
'ii"yā" chí nguée' n'daaca, 'ii"yā"
s'ee" ní cuuvi snaa" yā ntii"nyu" chí
n'daaca ca chí idií" nī. Ní cuuvi

'caaⁿ'máⁿ yā chi ch'εεte ca Ndyuūs nguuvī chi Ndyuūs ndaa yā taama vmnéⁿēē ní nguai yā cuenta yeⁿe nuūⁿndī yeⁿe yú.

¹³Canée chi díⁿ nī tan'dúú^{cā} chi ngaⁿ'ā 'iiⁿntyéⁿ'ē 'āā du'ú nuūⁿ chi véé nduuti chi saⁿ'ā rey o chí 'iiⁿntyéⁿ'ē ch'εεte. Ní n'daacā canee nī nanáaⁿ yā caavā chi ndís'tiī ní yeⁿ'ē Señor Ndyuūs yeⁿe yú ndís'tiī. ¹⁴Ní díⁿ nī chi ngaⁿ'a 'iiⁿyāⁿ 'iiⁿntyéⁿ'ē chi Ndyuūs s'neéⁿ yā miiⁿ caati 'iiⁿntyéⁿ'ē cuuvi ca'a yā castigo 'iiⁿyāⁿ chi nguée n'daacā idiíⁿ yā ní cuuvi caaⁿ'máⁿ yā chi ch'εεtē 'iiⁿyāⁿ chi n'daacā idiíⁿ yā. ¹⁵Ti chuū ní chiiⁿ chi Ndyuūs neⁿ'é yā chi díⁿ nī. Ní cáávā chi ndís'tiī din'daacā nī, 'iiⁿyāⁿ chi zonzo yā ní nguée deenu yā nguée cuuvi caaⁿ'máⁿ yā de'ē vee contra yeⁿe ndís'tiī.

¹⁶Ní 'cuεetinée nī tan'dúú^{cā} 'iiⁿyāⁿ chi canée libre yā. Nguée díⁿ nī chiiⁿ chi nguεe n'daacā cucáávā chi canée libre nī, ní ngaⁿ'ā nī chi cuuvi díⁿ nī 'túú^{cā}. N'daacā ca chi 'cuεetinée n'daacā nī ti ndís'tiī 'iiⁿyāⁿ chi 'áámá canee chi dichíí'vē Ndyuūs. ¹⁷Ní díⁿ nī honrar nducyaaca 'iiⁿyāⁿ. Ní dinéⁿ'ē nī nducyaaca hermanos yeⁿe yú. 'Va'a nī Ndyuūs ní díⁿ nī honrar emperador chi 'iiⁿntyéⁿ'ē.

Yeⁿe chi Cristo n'geenu yā ngii chi ejemplo yeⁿe yú

¹⁸Ndís'tiī 'iiⁿyāⁿ criados chi chíí'vē, díⁿ nī respetar patrón yeⁿ'é nī ní díⁿ nī tan'dúú^{cā} chi ngaⁿ'a patrón yeⁿe nī, nguée dámaāⁿ patrón yeⁿ'é nī chi din'daacā ní n'dai yā naati patrón yeⁿ'é nī chi nguée din'daaca yā ní taaⁿ yā.

¹⁹Caati n'daacā ca chi cuchee nī taachi n'geenu nī ngii cáávā cosas chi nguée n'daacā chi díⁿ 'iiⁿyāⁿ chi contra yeⁿ'é nī. Ní cuchee nī ti deenu nī chi n'daacā idiíⁿ nī. ²⁰'Íícā Ndyuūs neⁿ'e yā chi díⁿ nī. ²⁰'Íícā ch'εεte chuū nduuti chi n'geenú nī ngii ti véé nuuⁿndi yeⁿ'é nī nī 'tíícā castigo yeⁿ'é nī, ní ichée nī? Nguée ch'εεte chuū. Naati nduuti chi n'geenu nī ngii ti n'daacā idiíⁿ nī nī ngiinū ngiinū cuchee nī tuu'mi ní Ndyuūs nadi'viicú yā ndís'tiī. ²¹Ní yaa'ví yā ndís'tiī caavā chi díⁿ nī 'tíícā. Cristo 'āā ch'leenú yā chii cáávā s'uuúⁿ ní s'neéⁿ yā 'áámá ejemplo yeⁿe yú. Ní s'uuúⁿ canée chi 'tíícā nuūⁿ díⁿ yú tan'dúú^{cā} chi díⁿ yā. ²²Cristo miiⁿ nguée díⁿ yā mar 'áámá chuundi 'liiⁿ nuuⁿndi ní nguée chinnc'he'él yā mar 'áámá. ²³Ní taachí 'iiⁿyāⁿ s'eeⁿ ngaⁿ'a taáⁿ yā yeⁿ'e Cristo, Cristo miiⁿ nguée ngaⁿ'a taáⁿ yā yeⁿ'e yā. Ní taachi 'iiⁿyāⁿ s'eeⁿ díⁿ yā chi Cristo ya'ai ch'leenú yā chii nguée caⁿ'ā cúnncā yā yeⁿ'e yā. Naati cūnee ngiinú yā nanáaⁿ Ndyuūs chi cuaacu chí Ndyuūs caⁿ'ā yā n'diichi yā nuuⁿndi yeⁿ'e 'iiⁿyāⁿ s'eeⁿ. Ní Ndyuūs díⁿ yā cosa chi cuaacu. ²⁴Cristo maáⁿ yā candee yā nuuⁿndi yeⁿ'e yú na cuerpo yeⁿ'e maáⁿ yā taachi ch'ii yā na cruz. Ní 'íícú s'uuúⁿ ní cuuvi díⁿ yú tan'dúú^{cā} chi n'dii yú yeⁿ'e nuuⁿndi yeⁿ'e yú. Ní maaⁿ ní 'cuεetinee yú yeⁿ'e nducuéⁿ'ē chi n'daacā. Ní 'āā nnduuvá yeⁿ'ē yú yeⁿ'e castigo yeⁿ'e nuūⁿndi yeⁿ'e yú cáávā chi Cristo naca'ái yā cáávā nuuⁿndi yeⁿ'e yú. ²⁵Tiempo chi ch'ó'oo s'uuúⁿ ní tan'dúú^{cā} 'iiti cuūchi chi nindai tī 'tíícā s'uuúⁿ

naati maaⁿ ní ndaa yú nanááⁿ
Cristo chi candée yā cuidado s'uuúⁿ
tan'duucā 'áámá pastor. Cristo ní
candée yā cuidado alma yeⁿe yú.

Yeⁿé 'iiⁿyāⁿ chí 'níndívaacu chí
canéé chí 'caandiveéⁿ yā yeⁿé ví'i

3 'Tiicá ntúūⁿ ndís'tií n'daataá
chí 'níndívaacu tá, canéé
chí díiⁿ ní chí ngaⁿā isaⁿā yeⁿé ní.
Ní nduuti chí isaⁿā yeⁿé ní nguée
i'téenu sa Cristo, cuuvi cu'téenu
sa Cristo cáávā n'daataá yeⁿe sa
tí n'daacā n'geetinée tá. 'Áará chí
nguée ngaⁿā ta mar 'áámá nduudu
yeⁿe Cristo tuu'mi ní cuuvi cu'téenu
sa Cristo. ²Caati n'diichi sa chí
n'daataá yeⁿe sa yeⁿe nducuéⁿē
chí idiíⁿ tá ní n'daacā ní diiⁿ tá
respetar isaⁿā tá. ³Ní n'daataá
chí n'dai tá chí véé isaⁿā yeⁿe tá
nguée canéé chí sta'a tá cosas ní
s'nuuⁿ tá cosas miiⁿ na cuerpo yeⁿe
tá chí diiⁿ chí n'deēvee maaⁿ tá. Ní
nguée neené n'deēvéé diiⁿ tá tiíⁿ tá
o sta'a tá cosas yeⁿe 'diiⁿnguāⁿ o
catecai chí ya'ai chíf'vē chí snee
tá chí cuuvi dich'etē maaⁿ tá táⁿā.
⁴Naati n'deēvéé chí yeⁿe tá canee
chí cūnee yeⁿe maaⁿ tá ní canéé
chí n'deēvee tá ndúúcū espíritu yeⁿé
tá chí ndiicúúⁿ. Ní canee 'diiⁿ tá.
Chuū ní dichí'vē nanááⁿ Ndyuūs.
⁵Caati tiempo chí chó'oo 'tífā idiíⁿ
n'daataa s'eeⁿ chí yeⁿé Ndyuūs,
n'daataa chí i'téenu ca Ndyuūs ní
s'teenu tá chí ngaⁿā isaⁿā yeⁿe tá.
⁶Ní táⁿā Sara 'tiicá ntúūⁿ diiⁿ tá.
S'teenu tá isaⁿā yeⁿe tá chí nguuvi
Abraham. Ní ngaⁿā tá isaⁿā yeⁿe
tá: N'dii ní señor yeⁿé. Maaⁿ ní
ndís'tií cuuvi díiⁿ ní tan'dúúcā chí
ndís'tií daiya Sara ndís'tií nduuti

chí n'daacā idiíⁿ ní ní nguée 'va'á ní
yeⁿé mar 'áámá.

⁷Ní 'tiicá ntúūⁿ ndís'tií saⁿā chí
véé n'daataá yeⁿé ní. 'Cuēetinée
ní ndúúcū tá ní díiⁿ ní respetar
n'daataá yeⁿé ní. Ní díiⁿ ní honrar
n'daataá yeⁿe ní tan'dúúcā chí
deenu ní chí n'daacā ti n'daataa
miiⁿ nguée véé fuerzas yeⁿe tá
tan'dúúcā 'áámá saⁿā. Ní 'tiicá ntúūⁿ
Ndyuūs yeⁿe vaadi n'dai yeⁿé yā
ca'a yā vida yeⁿe tá daama daama
tan'dúúcā chí tee yā ndís'tií saⁿā. Ní
ndís'tií saⁿā díiⁿ ní 'túúcā ní nguée
du'ū vee chí di'vaachí ndís'tií yeⁿe
chí díiⁿ ní taachi ngaⁿangua'á ní.

Yeⁿe chí n'geenu yú ngii
caavā chí n'daacā idiíⁿ yú.

⁸Ní yeⁿe nducuéⁿē canéé chí
dáámá nūuⁿ nadacadíínuuⁿ ní
nducyaaca ndís'tií ní dáámá nūuⁿ
nadacadíínuuⁿ ní na staava yeⁿé
ní. Dinéⁿe ní 'aama ní taama ní
tan'dúúcā chí cuáácú chí vi'í ní. Ní
ya'ai 'iinú ní 'aamá ní taama ní. Ní
diiⁿ chí ndiicúúⁿ ní 'aamá ní ndúúcū
taama ní. ⁹Taachi 'iiⁿyāⁿ nguée
n'daacā idiíⁿ yā ndúúcū ní nguée
idiíⁿ ní chí nguée ndaacā ndúúcū
yā. Ní taachi 'iiⁿyāⁿ nguée n'daacā
caaⁿmáⁿ yā yeⁿé ní nguée cunncaā
caaⁿmáⁿ ní yeⁿe yā. Ndaacā ca
díiⁿ ní ní caaⁿmáⁿ ní ndúúcū 'iiⁿyāⁿ
s'tií ní di'viicú ní 'iiⁿyāⁿ s'tií. 'Tífā
Ndyuūs cuuvi di'viicú yā ndís'tií.
Ndyuūs yaa'ví yā ndís'tií chí cuuvi
yeⁿé yā ti díiⁿ yā 'tífā nduucú
ní. ¹⁰Canéé nguūⁿ na libro yeⁿé
Ndyuūs 'tífā:

'Iiⁿyāⁿ chí neⁿe chí yeenú yā
ndúúcū vida yeⁿé yā ní neⁿé
yā chí véé nduuyu yeⁿé yā, 'āā

ntéé canéé chi caaⁿ máⁿ yā dendu'ū chi nguée n'daacā. Ní nguée caaⁿ máⁿ yā nduudu yaadi. ¹¹Canéé chi diví yā yeⁿe nducueⁿe chi nguée n'daacā ní dámaāⁿ dííⁿ yā chi n'daacā. Canéé chí neⁿé yā vaadi 'diiíⁿ ní dííⁿ yā nducueⁿe chi véé vaadi 'diiíⁿ yeⁿe yā. ¹²Señor Ndyuūs yeⁿe yú maāⁿ yā 'iiⁿyāⁿ chi din'daacá yā. Ní cueⁿe daāⁿmaⁿ n'giindiveéⁿ yā chi 'iiⁿyāⁿ s'eeⁿ ngaⁿ angua^a yā. Ní Señor yeⁿe yú ní contra yeⁿe 'iiⁿyāⁿ chi nguée n'daacā idiíⁿ yā.

¹³¿Du'ú 'iiⁿyāⁿ chi'nuucá'ai yā ndís'tii nduuti chi ndís'tii nducueⁿe tiempo dííⁿ nī chi n'daacā? Nguée dííⁿ yā 'tíicā. ¹⁴Ní nduuti chi ndís'tii n'geenu nī ngii cáávā chi n'daacā idiíⁿ nī tuu'mi ní yeenú nī. Nguée dííⁿ 'va'a nī yeⁿe mar 'áamá 'iiⁿyāⁿ ní nguée dí'yáá nī cuuvi. ¹⁵Canéé chí dich'eté nī Cristo na staava yeⁿe nī ní 'cuaáⁿ nī lugar Cristo chi 'iiví nī. Ní canéé listo nī chi cuuvi nan'gueecútaⁿá nī 'āā du'ú nūuⁿ 'iiⁿyāⁿ chi intiinguuneeⁿ ndís'tii 'tíicā: Ndís'tii de'e cáávā chi cūnee ngínú nī yeⁿe Ndyuūs yeⁿe nī. Ní taachi nan'gueecutaⁿá nī yeⁿe yā dííⁿ nī chi ndiicúúⁿ n'dai nī. Ní dííⁿ nī respetar 'iiⁿyāⁿ. ¹⁶Cuētinéé n'daaca nī chi nguée véé chi nadacadínuuⁿ nī yeⁿe chi nguée n'daacā chi dííⁿ nī. Ní 'iiⁿyāⁿ chi cunncaā ngaⁿa yā yeⁿe chi n'daacā chi dííⁿ nī caavā chi i'téenu nī Cristo, cuuvi 'cuináaⁿ yā cáávā chi ngaⁿá yā. ¹⁷N'dáacā ca chi 'cueenu yú cuuvi cáávā cosas chi n'daacā

idiiⁿ yú nduuti chi Ndyuūs neⁿé yā 'tíicā, nguée ti cáávā cosas chi nguée n'daacā idiiⁿ yú.

¹⁸Cristo miiⁿ maāⁿ yā ch'eenú yā chíi chi ch'ii yā cáávā nuuⁿndi yeⁿe yú ní 'áamá vmnéⁿee ch'ii Cristo cáávā nuuⁿndi yeⁿe nducyaaca 'iiⁿyāⁿ, ní nguée nuuⁿndi yeⁿe yā. Ní ch'ii yā caati cuuvi candée ya s'uuúⁿ nanááⁿ Ndyuūs. Cuáácú ch'ii cuerpo yeⁿe yā naati espíritu yeⁿe yā nduuchi. ¹⁹Ní espíritu yeⁿe Cristo cuayiivi chi ch'ii yā cheⁿe yā ní caⁿa yā nduudu cuaacu yeⁿe Ndyuūs nanááⁿ espíritu s'eeⁿ yeⁿe 'iiⁿyāⁿ s'eeⁿ chi n'dií. Ní espíritu s'eeⁿ ní preso yā na lugar yeⁿe espíritu s'eeⁿ. ²⁰Espíritu s'eeⁿ ní yeⁿe 'iiⁿyāⁿ chi nguée ch'iindiveéⁿ yā Ndyuūs 'áamá tiempo chi 'āā chó'oo. Ní Ndyuūs canee ngínú yā ní 'diiíⁿ canéé yā chi 'iiⁿyāⁿ s'eeⁿ ndaacadaamí yā yeⁿe nuuⁿndi yeⁿe yā 'naaⁿ tiempo chi saⁿā Noé din'dái sa 'áamá arco chí barco ch'etete. Ní ch'eti barco miiⁿ n'duuví 'iiⁿyāⁿ, dámaāⁿ niini yā, ní nguaⁿ'ai yā yeⁿe nuūⁿnīⁿ. ²¹Ní nuūⁿnīⁿ miiⁿ ní tan'dúucā nuūⁿnīⁿ chi ngeedínuūⁿnīⁿ yú chi nanguaⁿ'āi s'uuúⁿ. 'Tíicā nuuⁿniⁿ miiⁿ. Taachi ngeedínuūⁿnīⁿ yú nguée caavā chi naaⁿnu cuerpo yeⁿe yú naati cáávā chi 'áamá compromiso yeⁿe yú nanááⁿ Ndyuūs. Ní n'daacā diiⁿ yú chuū ndúucū núúⁿmáⁿ staava yeⁿe yú. Ní Ndyuūs nadanguáⁿ'ai yā s'uuúⁿ chi i'teenu yú Cristo cáávā Cristo nducueeⁿ yā yeⁿe nguaaⁿ tináⁿā. ²²Ní Cristo miiⁿ cunaⁿá yā na va'ai ch'eti nguuví ní maaⁿ canee yā lado yeⁿe honor yeⁿe Ndyuūs chi lado tá cuaacu. Ní Cristo ngaⁿa ntiíⁿnyúⁿ

yā yeⁿé ángeles ndúúcu 'iiⁿntyéⁿē
ní yeⁿē poderes chi véé.

**Canee chi dichí^fve yú
Ndyuūs tan'dúúca chi Ndyuūs
tee yā fuerzas s'uuúⁿ**

4 Tan'dúúca Cristo ch'eenú yā
chií ní díⁿ yā sentir na cuerpo
yeⁿé yā 'tiicá ntúúⁿ ndís'tií canéé
chi cuta'á nī fuerzas yeⁿé nī cáávā
tiempo chi caⁿá nī 'cuenú nī cuuvi.
Maaⁿ ní 'iiⁿyāⁿ s'eeⁿ chí ch'eenú
yā chií ní díⁿ yā sentir na cuerpo
yeⁿé yā 'āā ntéé neⁿé yā dinuuⁿndi
yā. ²Ní ndíí maaⁿ ndís'tií canee chi
díⁿ nī tanducuéⁿē chi neⁿe Ndyuūs
chi díⁿ nī tanducuéⁿē nguuví yeⁿe
nī. Ní nguéé díⁿ nī tan'dúúca chi
maaⁿ cuerpo yeⁿé nī neⁿe chi díⁿ
nī. ³Tiempo chi 'āā chó'oo ní diiⁿ
yú tan'dúúca 'iiⁿyāⁿ chi nguéé yeⁿe
ndaata Israel chi nguéé i'téenu yā
Ndyuūs. Tiempo miiⁿ ní diiⁿ yú
cosas chi nguéé n'daaca. Ní diiⁿ yú
nuuⁿndi tan'dúúca chi neⁿe cuerpo
yeⁿe yú chi diiⁿ yú. Ní 'cuūⁿvi yú
ní cho'o nee che'e yú taachi véé
fiesta yeⁿē chi che'e yú. Ní cu'u ca
yú vino. Ní s'teenú yú santo s'eeⁿ
chi ídolo s'eeⁿ. ⁴'Iiⁿyāⁿ s'eeⁿ chi
nguéé i'téenu yā Cristo, ¿De'ē cáávā
chi nadacadíínuuⁿ yā chi ndís'tií
nguéé nduuvidaamá nī ndúúcu
yā, ní nguéé idiíⁿ nī ndúúcu yā
cosas chi nguéé n'daaca? Ní chíⁿ
chi 'iiⁿyāⁿ s'eeⁿ ní cunncāā ngaⁿa
yā yeⁿé nī. ⁵'Iiⁿyāⁿ s'eeⁿ canéé chi
nga'a yā cuenta yeⁿe vida yeⁿe
maáⁿ yā nanááⁿ Cristo chi díⁿ yā
juzgar nducyaaca 'iiⁿyāⁿ, 'iiⁿyāⁿ chi
canduuchi ndúúcu 'iiⁿyāⁿ chi n'díí.
⁶Ní cáávā chuū Cristo ngaⁿá yā
nduudu cuaacu yeⁿe maáⁿ yā nanááⁿ

espíritus yeⁿe 'iiⁿyāⁿ chi n'díí caati
espíritus yeⁿé yā cuuvi canduuchi
tan'dúúca chi Ndyuūs canduuchí yā.
Ní Ndyuūs n'diichí yā nuuⁿndi yeⁿé
'iiⁿyāⁿ s'eeⁿ taachi ch'etinee yā
iⁿ'yeeⁿdí 'cūū tan'dúúca chi n'diichí
yā nuuⁿndi yeⁿe nducyáácá 'iiⁿyāⁿ
chi snee yā iⁿ'yeeⁿdi 'cūū.

⁷'Āā cháā snee niíⁿnuúⁿ nguuví chi
'cuiinu tanducuéⁿē denduⁿ. Ní cáávā
chuū 'cuēetinee n'daaca nī ní 'āā de'ē
ora nūuⁿ ní cuuvi caaⁿmaⁿngua'á
nī. ⁸Ní yeⁿē tanducuéⁿē dineⁿe cá
nī 'aama nī taama nī caati taachi
dineⁿe cá nī tuuⁿmi ní inadich'ēecú
nī nuuⁿndi yeⁿē 'áámá nī taama
nī. ⁹Cuaáⁿ nī 'áámá nī taama nī na
vaacu nī ní nguéé 'cuēecu cheendí
nī. ¹⁰Ní ca'áámá ca'aama nī ní díⁿ
nī servir taamá nī ndúúcu ntiíⁿnyuⁿ
chi Ndyuūs itée yā chi díⁿ nī. Ní
canéé chi diiⁿ n'daaca nī ntiíⁿnyuⁿ
yeⁿé nī chi Ndyuūs itée yā ca'aama
ca'aamá nī ti Ndyuūs itée yā ndís'tií
nducuéⁿē chi n'dai taavi yeⁿe yā.
¹¹Nduuti chi 'áámá nī candee nī
nduudu cuaacu canéé chí ngaⁿá yā
nduudu cuaacu yeⁿé Ndyuūs. Nduuti
chi 'aamá nī díⁿ nī ntiíⁿnyuⁿ yeⁿe
yaācū canéé chi díⁿ yā ndúúcu
nducuéⁿē fuerzas yeⁿé yā chi
Ndyuūs ca'a yā 'iiⁿyāⁿ miiⁿ. Ní yeⁿe
tanducuéⁿē chi ndís'tií díⁿ nī canéé
chi díⁿ nī chi cuuvi dich'etē nī
Ndyuūs cucáávā Jesucristo. Ní yeⁿé
Ndyuūs chí ngíí dēeve yeⁿe yā ní vee
poder yeⁿé yā tanducuéⁿē tiempo.
'Tííca yā.

**Canéé chi n'geenu yú ngii
ti yeⁿe Cristo s'uuúⁿ**

¹²Ndís'tií hermanos chi neⁿé taavi
nguéé nadacadíínuuⁿ nī chi cosa

chi díftūu nguée canée chí chó'oo yeⁿé nī taachi 'iiⁿyāⁿ n'diichineeⁿ cá yā ndís'tiī chi ya'ai n'geenú nī ngii ti canée chí chó'oo yeⁿé nī 'tíicā. ¹³Naati canée chí cuuvi yeenú nī taachí n'geenú nī ngii tan'dúucā Cristo ch'eenú yā chii. Ní cuayiivi cuuvi yeenú cá nī taachi Cristo ndaa yā taama vmnéⁿēe ní 'cuuⁿmíⁿ yā chi ch'εεε n'dai ngiichí yā tan'dúucā dεεve ngiichí ch'εεε.

¹⁴Nduuti chi 'iiⁿyāⁿ n'gaa'vá yā ndúucu nī cucáávā chi i'téenu nī Cristo tuu'mi ní yeenú nī. Espiritu N'dai yeⁿé Ndyuūs chí dεεvé ngii canée ndúucū ndís'tiī. Áará chí 'iiⁿyāⁿ s'eeⁿ cunncaā ngaⁿa yā yeⁿe Cristo, ndís'tiī ní dííⁿ nī honrar Cristo. ¹⁵Ní nduuti chi 'áámá chée ndís'tiī n'geenu nī ngii 'úu nguée neⁿé chi 'cuenú nī cuuvi caati ch'iíⁿnúⁿ nī 'iiⁿyāⁿ o ididuucú nī o nguée dííⁿ nī tan'dúucā chi ngaⁿā ley yeⁿé Ndyuūs chi ch'εεε ca.

¹⁶Ní nduuti chi 'áámá chεε ndís'tiī n'geenu nī ngii cáávā chi i'téenu nī Cristo nguée cuuvi 'cuinaáⁿ nī naati canee chi dich'εεé nī Ndyuūs caati 'iiⁿyāⁿ ngaⁿa yā chí díí ní yeⁿe Cristo dii.

¹⁷Áā ndaa tiempo chi Cristo caⁿá yā n'diichi yā nuuⁿndi yeⁿe 'iiⁿyāⁿ ní vmnááⁿ vmnaaⁿ caⁿá yā n'diichí yā nuuⁿndi yeⁿe 'iiⁿyāⁿ chi i'téenu yā 'iiⁿyāⁿ. Ní nduuti chi vmnááⁿ vmnaaⁿ n'diichí yā nuuⁿndi yeⁿe yú, 'táácā cuuvi yeⁿé 'iiⁿyāⁿ chi nguée i'téenu yā nduudu cuaacu yeⁿé Ndyuūs cuayiivi taachi n'diichí Cristo nuuⁿndi yeⁿe yā? ¹⁸Ní nduuti chí ngí'ii chí 'iiⁿyāⁿ chí n'dai cuuvi nanguaⁿai yā, 'déd'ε cuuví ndúucū 'iiⁿyāⁿ chí nguée n'daacā dííⁿ yā ní

ndúucū 'iiⁿyāⁿ chí dinuuⁿndí yā ní nguée i'téenu yā? ¹⁹Ní 'tíicā canee chí diiⁿ yú. Taachi n'geenu yú ngii caavā chí Ndyuūs neⁿé yā chí diiⁿ yú 'tíicā, canée chí diiⁿ yú nducuéⁿē chí n'daacā. Ní canée chí nga'a yú vida yeⁿe yú na ta'a Ndyuūs caati Ndyuūs din'dái yā s'uuúⁿ ní 'indεε yā cuidado s'uuúⁿ. Ndyuūs ní dííⁿ yā chiiⁿ chí ngaⁿa yā chí caⁿa yā diiⁿ yā.

Yeⁿé 'iiⁿyāⁿ chí i'téenu yā Ndyuūs

5 'Úú Pedro ca'á consejo 'iiⁿntyēⁿē yeⁿe yaācū chí snée nguaaⁿ ndís'tiī. 'Úú 'tiicā ntúūⁿ 'iiⁿntyēⁿē 'úú. 'Úú ngaⁿá yeⁿe Cristo tan'dúucā chí ch'eenú yā chí ti n'diichí nduucū nduutinaáⁿ maáⁿ. Ní 'tiicā ntúūⁿ véé parte yeⁿé vaadi dεεve ngii chí Ndyuūs 'cuuⁿmíⁿ yā s'uuúⁿ cuayiivi. ²Ndís'tiī 'iiⁿntyēⁿē yeⁿe yaācū, idiíⁿ nī ntiíⁿnyuⁿ yeⁿé nī tan'dúucā 'áámá pastor chí indεε yā cuidado yeⁿe 'iiti cuūchī. 'Tíicā dííⁿ nī ndúucū 'iiⁿyāⁿ chí yeⁿé Ndyuūs chí caⁿá yā yaācū naachi ndís'tiī ní 'iiⁿntyéⁿē. Nguée dííⁿ nī ntiíⁿnyuⁿ yeⁿe nī chí canée chí dííⁿ nī naati dííⁿ nī ti maáⁿ nī neⁿe nī diiⁿ nī caati 'tíicā neⁿe Ndyuūs. Nguée dííⁿ nī caavā chí cuta'á nī tuūmī naati dííⁿ nī ndúucū nuuⁿmaⁿ staava yeⁿé nī chí n'dai. ³Nguée dííⁿ nī ndúucū 'iiⁿyāⁿ chí maaⁿ cuidado yeⁿé nī tan'dúucā chí ndís'tiī ní 'iiví yeⁿé yā naati 'cuεetinée n'daacá nī níicú 'iiⁿyāⁿ cuuvi n'diichí yā ndís'tiī ní dííⁿ yā tan'dúucā chí ndís'tiī dííⁿ nī. ⁴Ní 'íicú taachi ndaa Jesucristo chí 'iiⁿyāⁿ chí ndíí tiiíⁿ chí ícandεε yā cuidado yeⁿe 'iiⁿyāⁿ yeⁿé yā tan'dúucā 'áámá pastor chí

ndii tiiⁿ chí ícandee yā cuidado
'iiti yeⁿé yā, tuu'mi ní ndís'tii cuuvi
cuta'á ní 'áamá corona chi nguée
'cuiinu dēevé yeⁿé. Nguée corona
yeⁿe yaātā chi ituuvií.

⁵Tiicá ntúūⁿ ndís'tii saⁿā
da'caiyāā canée chí díⁿ ní tan'dúúca
chi ngaⁿa 'iiⁿntyeⁿé yeⁿe yaācū.
Nducyaaca ní canée chí ndiicuuⁿ
ní ní cunnee ní 'aama ní taama ní
caati canée nguūⁿ na libro yeⁿé
Ndyuūs 'tíicā:

Ndyuūs nguée neⁿe yā 'iiⁿyāⁿ
chi nacadínuuⁿ yā chi maáⁿ
yā ch'ēete yā naati ca'á yā
nducuéⁿé chi n'dai yeⁿe yā
'iiⁿyāⁿ chi ndiicúúⁿ.

⁶Maaⁿ ní nducyaaca ndís'tii ndiicúúⁿ
n'dai 'cuēetinée ní maaⁿ poder yeⁿé
Ndyuūs ti Ndyuūs cuuvi dich'ēeté yā
ndís'tii tiempo chi neⁿé yā. ⁷Ca'á ní
nducueⁿé cuidado chi díttū yeⁿe
ní na ta'a Cristo caati Cristo candee
yā cuidado yeⁿe ndís'tii.

⁸Canée listo ní ní nguée
'cuētiyaadú ní. Cundee ní cuidado
chi n'daacā 'cuēetinée ní ti
yááⁿn'guiinūⁿ miiⁿ chí contra yeⁿe
ní chíicá sá ní n'diichi sa ndii 'muuⁿ
ní ndii miiⁿ. Ní tan'dúúca 'áamá
'yái'yāⁿ cuá'áa n'gai tí ní cachiicá
tí ní i'nuúⁿ tí du'u chi cuuvi che'é
tí 'tíicā díⁿ yááⁿn'guiinūⁿ miiⁿ.

⁹Nguée ca'a ní lugar yááⁿn'guiinuúⁿ
'cūū naati 'áamá cūnee ní ndúúcu
chi i'téenu ní. Ní déenu ní chi
'āā daamá nūⁿ n'geenu yú ngii
tan'dúúca nducyaaca hermanos chi
s'néeⁿ yā na núúⁿmáⁿ íⁿyeeⁿdí ti
i'téenu yā Cristo. ¹⁰Ní cuayiivi chi
ch'eenú ní chií duu'vi tiempo nūⁿ

tuu'mi ní Ndyuūs díⁿ yā chi ndeeve
canée vida yeⁿe ní. Ní diituú canee
ní ndúúcu chi i'téenu ní Ndyuūs. Ní
Ndyuūs ca'á yā fuerzas yeⁿe ní ní
díⁿ yā chi seguro canee ní ndúúcu
chi i'téenu ní. Maaⁿ Ndyuūs miiⁿ ní
teé yā nducuéⁿé chi n'dai. Ní maáⁿ
yā yaa'ví yā s'uuúⁿ chi cuuvi yeⁿé
yā s'uuúⁿ cáávā chi véé parte yeⁿe
yú ndúúcu dēeve ngii ch'ēete yeⁿé
yā caati s'uuúⁿ ní yeⁿe Cristo s'uuúⁿ.
¹¹Caaⁿmaⁿ yú chi Ndyuūs ní ch'ēete
n'dai yā ní yeⁿé yā véé nducuéⁿé
poder chi véé ní cueⁿe daāⁿmaⁿ
cueⁿe daāⁿmaⁿ 'tíicā.

**'Cuiinu carta miiⁿ ní yaa'vi
yā 'iiⁿyāⁿ chi n'daí ndís'tii**

¹²Téé nūⁿ idinguúⁿ carta 'cūū
yeⁿé ndís'tii ní hermano Silvano
nginnee sa 'úú. Nadicádiinúúⁿ chi
Silvano miiⁿ ní hermano chi n'dai
taavi. 'Úú teé consejo ndís'tii chi
seguro canee ndís'tii chi nducuéⁿé
chi Ndyuūs itee yā ndís'tii yeⁿe
vaadi n'dai yeⁿé yā ní yeⁿé ní ti
neⁿé yā ndís'tii. Maaⁿ ní 'cuēetinée
n'daaca ní ní diituu canee ní ní
cuchée ní yeⁿe tanducuéⁿé chuū.

¹³Iiⁿyāⁿ yeⁿe yaācū chi canee na
yāāⁿ Babilonia chi Ndyuūs didēevé
yā tan'dúúca s'uuúⁿ: N'daí ndís'tii,
ngaⁿa yā. 'Tiicá ntúūⁿ Marcos
chi tan'dúúca daiyá: N'daí ndís'tii,
ngaⁿa sa. ¹⁴Ndís'tii hermanos:
N'daí ní, ngaⁿa ní 'aama ní taama
ní ti neⁿé ní 'aama ní taama ní ti
yeⁿé Cristo ndís'tii. Ní Ndyuūs téé
yā vaadi 'diiⁿ yeⁿé yā nducyaacá
ndís'tii chi yeⁿe Cristo. 'Tíicā
cuuvi.